



**KENYATAAN AKHBAR
OLEH KETUA AUDIT NEGARA**

**BERKENAAN:
LAPORAN KETUA AUDIT NEGARA MENGENAI PENYATA KEWANGAN
KERAJAAN NEGERI DAN PRESTASI KEWANGAN AGENSI
NEGERI TERENGGANU TAHUN 2018**

1. Pengauditan Penyata Kewangan Kerajaan Negeri Terengganu dilaksanakan selaras dengan Seksyen 5(1)(a) Akta Audit 1957 yang menghendaki Ketua Audit Negara mengaudit akaun Persekutuan dan negeri. Perkara 107 (1) Perlembagaan Persekutuan menghendaki Ketua Audit Negara mengemukakan laporannya kepada Yang di-Pertuan Agong yang hendaklah menyebabkan laporan itu dibentangkan di hadapan Dewan Rakyat. Perkara 107 (2) pula menyebut mana-mana laporan yang berhubungan dengan sesuatu negeri hendaklah dikemukakan kepada Raja atau Yang di-Pertua Negeri bagi negeri itu untuk dibentangkan di hadapan Dewan Undangan Negeri.
2. Laporan Ketua Audit Negara (LKAN) Mengenai Penyata Kewangan Kerajaan Negeri dan Prestasi Kewangan Agensi Negeri Negeri Terengganu Tahun 2018 telah dibentangkan di Dewan Rakyat pada 4 November 2019, setelah diperkenalkan oleh Kebawah Duli Yang Maha Mulia Seri Paduka Baginda Yang di-Pertuan Agong. Seterusnya LKAN telah mendapat perkenan Kebawah Duli Yang Maha Mulia Tuanku Sultan Terengganu untuk dibentangkan di Dewan Undangan Negeri Terengganu pada 24 November 2019.
3. LKAN pada kali ini antara lainnya mengandungi perkara-perkara penting seperti berikut:

3.1. Pengesahan Penyata Kewangan Kerajaan Negeri

Pengauditan terhadap penyata kewangan adalah untuk memberi pendapat sama ada penyata tersebut menunjukkan kedudukan kewangan yang benar dan saksama serta rekod perakaunan yang berkaitan telah

diselenggarakan dengan teratur dan kemas kini. Pengauditan yang dijalankan mendapati Penyata Kewangan Kerajaan Negeri Terengganu Bagi Tahun Berakhir 31 Disember 2018 telah diberi Pendapat Tanpa Teguran. Penyata kewangan tersebut menunjukkan gambaran yang benar dan saksama tentang kedudukan kewangan kerajaan negeri dan rekod perakaunan telah diselenggarakan dengan teratur dan kemas kini.

3.2. Analisis Kewangan Kerajaan Negeri

- a. Jabatan Audit Negara di samping mengesahkan penyata kewangan kerajaan negeri, juga membuat analisis terhadap kedudukan kewangan kerajaan negeri.
- b. Analisis Audit berdasarkan kepada Penyata Kedudukan Kewangan, Penyata Penerimaan dan Pembayaran Wang Tunai, Penyata Prestasi Kewangan, Penyata Akaun Memorandum dan Nota Kepada Penyata Kewangan, mendapati kedudukan kewangan kerajaan negeri adalah kurang stabil.
- c. Secara keseluruhannya, baki Kumpulan Wang Disatukan pada akhir tahun 2018 telah menurun sejumlah RM9.08 juta menjadi RM154.67 juta pada tahun 2018 berbanding RM163.75 juta pada tahun 2017.
- d. Akaun Hasil Disatukan menunjukkan defisit semasa berjumlah RM80.24 juta. Dengan ini, baki Akaun Hasil Disatukan pada akhir tahun 2018 mengalami defisit sejumlah RM2.61 juta berbanding lebihan RM77.63 juta pada akhir tahun 2017.
- e. Kutipan hasil menurun sejumlah RM280.34 juta atau 13.5% menjadi RM1.793 bilion berbanding RM2.073 bilion pada tahun 2017. Perbelanjaan mengurus (sebelum pindahan kepada Kumpulan Wang Pembangunan) pada tahun 2018 berjumlah RM1.248 bilion menurun sejumlah RM85.30 juta atau 6.4% berbanding RM1.333 bilion pada tahun 2017.
- f. Jumlah hutang awam menurun sejumlah RM173.81 juta atau 19.2% menjadi RM733.13 juta berbanding RM906.94 juta pada tahun 2017. Tunggalan bayaran balik hutang awam oleh kerajaan negeri

menurun sejumlah RM113.96 juta atau 21.3% menjadi RM422.12 juta berbanding RM536.08 juta pada tahun 2017.

3.3. Penyerahan, Pengesahan, Pembentangan Penyata Kewangan dan Prestasi Kewangan Agensi Negeri

- a. Mengikut Seksyen 5(1)(c), Akta Audit 1957, Ketua Audit Negara mempunyai kuasa untuk mengaudit penyata kewangan agensi negeri iaitu Badan Berkanun Negeri (BBN), Pihak Berkuasa Tempatan (PBT) dan Majlis Agama Islam (MAI). Objektif pengauditan adalah untuk memberikan pendapat terhadap penyata kewangan agensi negeri sama ada penyata ini menggambarkan kedudukan yang benar dan saksama serta rekod perakaunan yang berkaitan telah diselenggarakan dengan teratur dan kemas kini.
- b. Setakat 31 Julai 2019, bilangan penyata kewangan yang perlu diaudit dan telah disahkan adalah seperti berikut:

BIL.	PENYATA KEWANGAN	BILANGAN PENYATA KEWANGAN TAHUN 2018	PENSIJILAN SETAKAT 31.7.2019
1.	Badan Berkanun Negeri	8	6
2.	Pihak Berkuasa Tempatan	7	6
3.	Majlis Agama Islam Negeri	1	-
JUMLAH		16	12

- c. Sebanyak 15 daripada 16 Agensi Negeri telah mengemukakan penyata kewangan bagi tahun berakhir 31 Disember 2018 untuk diaudit. Dua belas daripada 15 Penyata Kewangan tahun 2018 telah disahkan dan diberikan Pendapat Tanpa Teguran, iaitu enam (6) penyata kewangan BBN dan enam (6) penyata kewangan PBT. Satu (1) penyata kewangan BBN, satu (1) penyata kewangan PBT dan penyata kewangan MAI masih belum disahkan. Satu (1) agensi lagi belum masih belum mengemukakan penyata kewangan tahun 2018 untuk diaudit.

4. LKAN Mengenai Penyata Kewangan Kerajaan Negeri dan Prestasi Kewangan Agensi Negeri Tahun 2018 bagi Negeri Terengganu dijadual dibentangkan di hadapan Dewan Undangan Negeri Terengganu pada 24 November 2019. Oleh itu, LKAN ini akan dimuat naik di laman web Jabatan Audit Negara pada tarikh yang sama. Orang awam boleh melayarinya di alamat <http://www.audit.gov.my> mulai 24 November 2019 selepas jam 10.00 pagi. Sebarang pertanyaan lanjut/pandangan mengenai Laporan tersebut bolehlah dialamatkan kepada [Warkah Untuk Ketua Audit Negara](#).

Ketua Audit Negara
Malaysia

24 November 2019